

CM

Chief Minister Pu Lalduhoma'n zofate ram pathumah thendarhin an awm a ti a, ramriin daidan mahse hnam ri erawh a kham theih loh avangin inngeih taka awm a pawimawh tih a sawi. He thu hi nimina Assembly House Conference Hall-ah Chhura Thawnthu (Hnam hrang hrangte sawi dan) tih lehkhahu Padma Shree RL Thanmawia ziah a tlangzarhna ah sawiin Pu Lalduhoma chuan Chhura chanchin atangin Zofate chu hnam khat an nihzia a Chiang a ti a, hnam bil tawng a danglam hlek angin hming pawh a danglam hlek tih sawiin ram pathumah thendarh ni mahse zofa hmun hrang hrang ami te inngeih taka awm a pawimawh tih a sawi. Chief Minister chuan zofate hnam tobul chhuichhuaha, sawrkar pawmpui leh mipuite pawm tlan neih a tul thu sawiin a bultantu tur an insiam chho mek a ti a. Sawrkar chuan zofate tobul leh an inpumkhatna a ngai pawimawh hle tih a sawi bawk.



CM INAUGURATES ZX TAMDIL LAKE RESORT

Chief Minister Pu Lalduhoma Sawrkar department hnuaia enkawl hmun thenkhat luah tlak loh a awm thin avangin mimal enkawl na hnuaia awm chu a tul chang awm tih sawiin sawrkar hmun hrang hrang a tul danin mimal enkawl hawh tir thin a ni tih a sawi.

He thu hi nimina ZX Eden Tamdil Lake Resort a hawnna ah sawiin Chief Minister chuan Tamdil resort chu hma a sawn zawk theih nan Tourism department chuan mimal enkawl turin a hawh tir a ti a, hmun thenkhatah a tul danin sawrkar ta chu mimal enkawl tir thin ani tih a sawi.

Chief Minister chuan Tamdil chu Mizoram dil neih zinga hmingthang ber pawl a ni a ti a, department pathum- fisheries, forest leh tourism hnuaia enkawl niin, Tamdil chu tha taka enkawl a, khualzin hip thei tura tan la turin line department te chu a chah a, Resort-in chhungkaw tam tak eizawnna a siamsak chu lawmawm a tih thu sawiin a enkawltute chu mi tam tak tana malsawmna ni tura duhsakna hlanin, theih tawp chhuah zel turin a fuih bawk.


Kum 2020 khan ZX Bamboo and woodworks te chuan thing leh mau hmanga inchung bungrua siamin bul an tan a, kum 2023 July atang khan Tourism privatisation scheme hnuaiah Tamdil Lake Resort hi kum 15 chhung an enkawl dawn a ni.



INTERNATIONAL MOTHER EARTH DAY

Vawiin hi mihringte chenna leilung ni, International Mother Earth Day a ni a, he ni pual hian Pachhunga University College chuan an college leh a chhehvelah Principal Prof. H. Lalthanzara hovin hun an hmang. PUC Principal chuan kumina International Mother Earth Day thupuiin a tum chu khawvelin mihring te hman tangkai theih tur chakna tha hrui a pekchhuah, renewable energy hrang hrang te tangkai leh uar zawka hman a nih thu a sawi a. Hemi chungchang inzirtirna chu an college in kawng hrang hrangin vawiinah hman a nih thu Akashvani a hrilh.

Vawiina Pachhunga University College in International Mother Earth Day an hmanah hian he ni chungchang inhrilhfiarna hun leh bawlhhlawh chhar faina hun te college huamchhungah hman a ni a. Hemi zawhah hian he ni chungchang puangzarin College Veng field thleng kawng zawhin hun hman a ni a. Hemi hnu hian Bethlehem Veng lam panin kawng an zawh chhunzawm a, International Mother Earth Day puala kawng zawhah hian zirlaite chu chenna leilung tichhe lo turin an intiam bawk a ni.



LAWNGTLAI KVK DISTRIBUTES MAIZE SEED

Vawiin khan KVK Lawngtlai bul tumin Phawngpui PACS, South Lungpher hnuaia loneitute hnenah vaimim chi tha sem a ni. Vaimin chi semnaah hian Phawngpui PACS hruaitute chuan loneitute kawmna hun an buatsaih a. Society kalphung leh loneitute nen tangkai zawka an thawhho theih dan tur te sawiho a ni a. Inkhawmhonaah hian Lawngtlai East MLA leh Adviser to CM Dr. Lorrain

Lalpekliana Chinzah hova PACS leh sawrkar thawhho dan tur ruahmanna chi hrang hrang tarlan a ni.

He hun hi KVK Lawngtlai Senior Scientist and Head Dr C. Lalfakawma chuan kaihruaiin, loneitu kal khawmte chu taima tak leh rinawm taka thawk turin a fuih a. KVK Lawngtlaia Agronomy lama mithiam bik, Pu Rualthankhuma chuan vaimim chin dan leh enkawl dan a zirtir a, Vaimim chi sem chhuah hi Quality tha leh Protein pai tam chi a nih thu tarlan a ni.

Phawngpui PACS hian loan chi hrang hrang an pek chhuah tawh zawng zawng belhkhawm chu cheng Nuai 100 chuang a ni tawh a. Kuthnathawkte hamthatna turin kawng hrang hrangin hma an la thin a ni.

